

NA NQATAXACPI NA YOTTA'A'T SHIYAXAUAPI MAYI NETALEC ANA 'ALHUA

Na Hua'auchiguii N'aqtacpi

Cha'ayi qaŷaŷateeta de'eda huesochiguii nataxac, qataq da huo'o ca qai'ot ŷaŷamaqchiguii, qataq da nlagaxayic mayi huetalec ana 'alhua, chigoqchigui, qataq da 'eetec da qaica da huo'o ca napacalec ca lŷa, huo'otaq da qaŷacona ca lalamaxat i 'oonolec 'enauac na shiŷaxauasat.

Qataq qaŷaŷateeta da souaxat ca saqaŷaŷateelec lataxac, qataq da qaŷI'ina 'I da lataxac ca shiŷaxaua, da nachida da chigoqchigui da qai'otec ca qauem qataq da saqaiyacnapec na ŷale, ŷoqo'oyi namayipi sa ishīt da pal da lavilŷaxac, qataq souaxat da qanasachigui naguī da qalapaxai da qaŷauotaique no'on llic na shiŷaxauasat, qataq naua aq naidauo na'axa'te mayi heutoiguilo da 'enauac na shiŷaxauapi ŷataqta huesochiguii qanqoŷin, imeuo da lcolanaxa qataq da lachoxoyic, qataq sa ishīt da qoŷinapega souaxat ca l'aqtac qataq souaxat ca l'amqaanataxanaxac.

Qataq iuen da ne'ena maichi lataxac na shiŷaxauapi ŷataqta qanpaxatalec qataq qai'ot ca llic, yaqto' ca shiŷaxaua sa ishīt da I'ot ca sa lhuennataxa, huaa nachi ishīt da dataŷa 'aguet cam sa ishīt da dechxonntaxan huo'otaq ca huetaiya' naq'en ca lŷa.

Qataq iuen da qalapaxai da qai'ot ca llic da yaqto' nhuoteeta't 'enauac na netaquete naua ŷotta 'a't 'ale'u.

Cha'ayi ne'ena ŷotta 'a't shiŷaxauapi mayi hueto'ot na huaxaŷa't nta'alpi, na mayipi mashi sogote da nasachigui da ŷirei da l'aqtac da 'enapec ŷataqa pi'iŷa'a ne'ena l'atchiguii maichi lataxacpi na shiŷaxauapi, qataq da maichi l'amaqchic i 'oonolec, qataq da lta'adaic naigui i 'oonolec, qataq da 'eetec na mavipi da qaica da huo'o ca napacalec ca lŷa, na ŷale qataq ana 'alo, qataq na mayipi I'axateec de'eda l'aqtac da yaqto' qai'ot ca llic da ŷaŷamaxai qanqoŷin na shiŷaxauapi qaica ca iueetac, yaqto' ca shiŷaxaua ŷataqta huesochiguii.

Qataq ne'ena nta'alpi mayi ŷalectau'a de'eda qai'ot, na mayipi ŷan da l'aqtac da 'enapec itauan da l'onataxanaxac nam huaxaŷa 't nta'alpi, da yaqto' ŷataqta qantela'a de'eda maichi lataxac nam netaquete naua ŷotta 'a't 'ale'u, qataq huesochiguii da I'ottac ca maichi laŷaanataxanaxac na shiŷaxauasat, qataq.

Qaŷaŷateeta da 'enauac ne'ena 'eeta'a't lhuennataxacpi qata ne'ena maichi lataxac na shiŷaxauapi, qataq da 'eetec da huesochiguii na mayipi, ŷataqta huo'o ca lta'araic naigui da ŷataqta qaipacchigui qai'ot, cha'avi maichi n'aqtac.

De'eda ima'a't ltaxaŷaxac na Nta'alpi

Lapaxai ne'ena n'aqtacpi mayi mashi qanasachigui da yaqto' mpaxatalec da maichi lataxac ma ŷotta't shiŷaxauapi, cha'ayi ŷataqta 'enauac da 'eeta'a't da lhuennataxac na mayipi, qaq ŷoqo'oyi iuen da 'enauac na shiŷaxauapi ŷotta'a't na l'aqtac n'aaxata 'a't, yaqto' i 'oonolec na mayipi hua'otaq na nocittagui ca l'onataxanaxac, ishīt da nachi 'eetai' tatapigui lauel damayi, qataq ishīt da huelec da I'ot, chigoqchigui

naq'en ca paxaguenaxac, qataq da na paxaguenataxanaxac, qataq ipacchigui naq'en damayi, da ishit da nquigaxattashiguem ca I'ot cam qanayiuta'a 'alhua, qataq naua lya 't 'ale'u, da yaqtohuo'o da nuattonaguec qataq da qaipacchigui da qai'ot ivida'alo naua lya't 'ale'u mayi nataq'en nanettau'a de'eda, qataq naua lya't 'ale'u qanayiitalguete mayi hueto'oto da lamaxasoxonaxac ne'ena nta'alpi.

ARTÍCULO 1

'Enauac na naaxat shiŷaxauapi na mayipi huesochiguii qataq 'eeta'a't da l'amaqchic qataq da 'enec qataq ŷataqta ŷaŷate'n naua lataxaco qataq nua no'o'n nvilŷaxaco, qaq ŷoqo'oyi iuen da i 'oonolec ŷataqta itauan ichoxoden ca lya

ARTÍCULO 2

'Enauac na shiŷaxauapi ŷalectau'a 'enauac ne'ena lataxaguesat qataq da 'eetec da huesochiguii qanqoŷin namayipi mayi mashi qanasachigui qataq qoŷidelec ana'ana nede, qaica da huo'o ca qaiŷotauga 'enauac na shiŷaxauasat na'aictaga ca 'eetec ca l'ogueyaxac ŷale qataq 'alo, qataq naua l'aqtaqa nataq 'en da l'amqajnataxanaxac huo'otaq da 'eetec cam laŷaanec huo'otaq da 'eetec ca lya naŷaanataxanaxac, qataq cam chigoqta'a 'alhua, huo'otaq cam chigoxoigui, sallaxanec huo'otaq choxodaq huo'otaq cam lya lataxac.

Nataq'en sa ishit da huo'o ca qaiŷotauga huasoilec da llic ca laŷaanataxanaxac huo'otaq na ŷotta 'a't llic na lataxaguesat cam 'alhua mayi netaa ca shiŷaxaua, nachi 'en 'am da huo'otaq netaa ca 'alhua mayi nalamaxat qoŷittalec na alaqqi huo'otaq da chochi qaipataxalec da ilotague', qalaxayi sa ishit da ŷaqauga huo'otaq da 'ico ' noxonecpi hueto 'ot da lamaxasoxonaxac ca nta'a mayi ilotague que'eca 'alhua.

ARTÍCULO 3

'Enauac i 'oonolec na shiŷaxauasat nhuanau'a da ntaunaguec da nachaalataxac, qataq ŷataqta huesochiguii, qataq ŷataqta qantela'a da nachaalataxac.

ARTÍCULO 4

Qaica da huo'o ca 'ico' nlatac huo'otaq da chochi qaŷamaqtac cha'ayi de'eda 'eetec ca nlatac huo'otaq da llic da chochi qaŷamaqtaq damayi nagui sa ishit da qaŷashiita da qai'ot.

ARTÍCULO 5

Qaica da huo'o ca qaŷauo'o ca nhuaxanaguec huo'otaq da qai'ot ca ncoitaguec huo'otaq da saqaichidapec, qaica ca qoŷanaigui qataq saqaiyacnapec.

ARTÍCULO 6

'Enauac na shiŷaxauasat sa ishit da qaillapeguem da huo 'o ca taigue, na 'aicta xa da ŷaqa 'a ca hueta 'a, qalaq qailo'oguet cha'ayi n'attau'a 'enauac na lataxaguesat.

ARTÍCULO 7

'Enauac na shiŷaxauasat 'eeta'a't qaica da huo'o ca napacalec ca lŷa souaxat na ŷotta'at llic na nqataxacpi, sa ishít da qaiŷottacachi namayipi cha'ayi nachi 'eeta'a't da hueto'ot na ŷotta'a't nqataxacpi. 'Enauac 'eeta'a't da hueto'ot da ltelaqtaxanaxac na nqataxacpi, qaica da huo'o ca qaiŷottapeuga huo'otaq da saqaipaguelec ne'ena n'aqtacpi mayi qoŷittai.

ARTÍCULO 8

'Ennauac na shiŷaxauasat ishít da I'ot ca llic ca l'aqtac da ŷaneu'a na aloico l'o'pi nta'alpi mayi ilotague' cam 'alhua, da yaqto' ca mayi qanpaxatalec sa ishít da qan'aqchít cha'ayi mashi n'attau'a na nqataxacpi mayi I'ot da qailo'oguet camayi, mayi n'attalecpi que'eca 'alhua.

ARTÍCULO 9

Qaica da huo'o ca chichi qaŷacoolec da qaicoi', qaŷapou'a, huo'otaq da qai'odauec nachi ca llalaqpi, cha'ayi ca mayi huo'o naq ' enec da yi'oqchigui nachaalataxac, yoqo'oyi iuen da qaŷaŷamaxatchiguii ca qai'otec, huo'otaq qai'otec ca lŷalataxac mayi ishít da mpaxatalec da lataxac ca mayi. 'Enauac na shiŷaxauasat sa ishít da huo'o ca qaillapeguem da huo'otaq I'ada't ca laŷipi da yaqto' nachajlec qataq da deqalaec cam 'eetapeguem camayipi.

ARTÍCULO 10

Enauac na shiŷaxauapi ishít da huo'o ca I'ot, cha'ayi namayipi nachi 'eeeta'am na laŷipi, da ishít da qan'axaŷaxana ca 'enapec, qataq da qai'otec cam ŷaŷamaqchiguii lataxac, huaa qanqoŷin ca ŷaqauga l'onataxanqa' nam loicnatac na aloicpi, mayi ŷaqauga da yagto' qaŷaŷamaxaji ca llic da lataxac camayi, qataq cam ishít da I'ot lataxac, huo'otaq da qanmit cam negue't ca lataxac mayi qaŷaqtapeguelec camayi, mayi iuen da qaidolec nam lataxacpi mayi I'ot ca llic na lasouaxashitpi.

ARTÍCULO 11

Enauac na shiŷaxauapi mayi huo'o cam chochi qaŷasaqtapeguelec ishít da chochi qanpaxatalec da huo'otaq saxanaxa da ŷoqta qaŷaŷateeta cam lasouaxashit da 'eesa, qaipacchigui ca 'enapec nam nqataxacpi qataq da llic da qanmit camayi, da huo'otaq saxanaxa da ŷoqta qaŷaŷateeta da ishít da dataŷa'aguet cam qaŷasaqtapelec lasouaxashit camayi.

Saishít da huo'o ca qaŷauo'o ca nhuaxanaguec souaxat cam I'ot, huo'otaq da huo'o ca lataxac saipaguelec, da huaqchigui da huo'o ca qai'ot mayi saishít da 'iso' na'aqchít nam lataxaguesat, mayi ishít da ŷashiita cam qanayiuta'a 'alhua huo'otaq cam lŷa 'alhua. Nataq'en saishít da qaŷasaxalec ca nhuaxanaguec lta'adaic mayi sanatenguem da lataxac co'ollaq qaitaxaŷapigui que'eca lasouaxashit.

ARTÍCULO 12

Qaica da huo'o ca qai'igueeta'a da huo'o ca qai'otec salataxac da lalamaxat nachaalataxac, huo'otaq na llalaqpi, qataq ca lma', qataq da

qaimeten aca lede, huo'otaq da qaishigueeta'a da no'on lataxac camayi, huo'otaq da no'on n'aqtaguec cha'ayi 'enauac na shiŷaxauapi iuen da ntela'a qanqoŷin na lataxacpi mayi I'ot na llic cam chochi nshiguenataxanaxac huo'otaq nshiunaxanaxac.

ARTÍCULO 13

'Enauac na shiŷaxauapi ishiti quenhuotapigui' qaica ca 'eetega qataq ishiti da maichi lca'aique cam naa que'eca 'alhua mayi hueta'a.

'Enauac na shiŷaxauapi ishiti da ca'ai cam hueta'a 'alhua, nachi 'en'am cam hueta'a ishiti da huo'o taŷa lŷa 'alhua, qataq ishiti da ŷI'iguelaxa cam chigoqchiguina 'alhua.

ARTÍCULO 14

Da huo'otaq huo'o ca qaicaatac, qalaq 'enauac na shiŷaxauapi ishiti da nmitaique ca lli'iguenqa', qataq iuen da ŷataqta machigui qanqoŷin, nai'ctaxa cam hueta'a 'alhua.

Qalaxayi de'eda lataxac saishiti da qai'ogoxona da huo'otaq qaŷataŷa'aguet ca I'ot nam loicnatac na lataxaguesat, da huo'otaq ŷataqta 'eesa cam qai'ot nasouaxashiti huo'otaq cam lŷa lataxac mayi dataŷa'aguet name lataxacpi mayi nasachigui co'ollaxa nam ŷotta 'a't nta 'alpi mayi huaxaŷa't.

ARTÍCULO 15

'Enauac na shiŷaxauapi ishiti, da nanedeuo cam hueta'a 'alhua.

Qaica da huo'o ca ishiti da saqaŷashinem da nanedaxac cam hueta'a 'alhua, huo'otaq da nadalaxat da nanedeu'a ca lŷa 'alhua mayi sa ishiti da lma'.

ARTÍCULO 16

'Enauac na ŷale qataq ana 'alo da ivita da mashi ŷI qalaq ishiti da saqaillapeguem ca I'ot souaxat da nqomshaxac huo'otaq cam chigoxoigui huo'otaq souaxat ca l'amqajnataxanaxac, nachi sa qaŷashinem da huadon uo'otaq da ŷauo'o na llalaqpi, huo'otaq da saqaŷalemamaxat de'eda ladonaxac, da a nca'altaic ca mayi, huo'otaq da nalte' aca lhua.

Nachaqdata da ŷoqta huesochiguini camayi huo'otaq da ŷataqta ŷaŷamaxadeeta ca I'ot, nachi ishiti da qaltaq huadon.

Cha'ayi ne'ena huadoota'a'tpi qataq na llalaqpi namayipi nachina na qanayiutapeguelec qataq nachina na 'ico'nllitai 'enauac na shiŷaxauapi cam qanayiuta'a qataq namayipi iuen da ŷataqta qampaxatalec que'eca qanayiuta'a 'alhua.

ARTÍCULO 17

'Enauac nashiŷaxauapi ishiti da ŷauo'o na maiche lalamaxatpi, huo'otaq da nhuaata'ai' ca lŷa.

Qaica da huo'o ca chochi qaŷacojlec da qaillapeguem ca maichi lalamaxat.

ARTÍCULO 18

'Enauac na shiŷaxauapi saishit da qaillapeguem da huesochiguii lataxac da lhuennataxac, huo'otaq da lavilŷaxac qataq ca l'amqajnataxanaxac, nataq'en saishit da qaillapeguem da nadalaxat cam l'amqajnataxanaxac huo'otaq da lpi'iŷaxac, nataq'en saishit da qaillapeguem da ŷachaxan ca lpi'iŷaxac huo'otaq da l'amqajnataxanaxac, nai>>ctaxa da 'oonolec camayi hue'otaq da huaxaiguet na laŷipi, nachi 'en'am da ŷataqta nachaxaata huo'otaq da saishit da nachaxaata, souaxat da napaxaguenataxanaxac, qataq da llic da huo'o ca I'ot, huo'otaq da ŷataqta ilotelec da llic cam l'amqanataxanaxac.

ARTÍCULO 19

'Enauac na shiŷaxauapi saishit da qaillapeguem da I'axat da lhuennataxac huo'otaq da huo'o ca l'aqtac; qaq de'eda 'eetec da saishet da qoŷinapega damayi ivida'a nataq'en da saishet da huo'otaq saqaŷalemaxat camayi souaxat cam lhuennataxac mayi I'axateec co'ollaxa, qataq saishet da huo'otaq qanmittac, qataq camayi ishite da huo'o ca I'axateec lhuennataxac, na'aictaxa da qaŷoqtegeu ivida'a ca lŷa 'alhua, qataq ishite da ŷachalec aca camachaqca lmalate na na'axaŷaxacpi.

ARTÍCULO 20

'Enauac na shiŷaxauapi ishite da ŷalegueu'a da huo'o na ntaxaŷaxac, huo'otaq da ŷalegoigui da huo'o ca naneda't shiŷaxauapi, da I'ot da llic cam 'eetapeguet ŷaŷamaqchiguii.

Qaica da huo'o ca chochi naŷamaxalec da nanedeu'a qanqoŷin da huo'oi ca naneda't shiŷaxauapi.

ARTÍCULO 21

'Enauac na shiŷaxauapi ishite da do'onoataxaneu'a da l'onataxanaxac ca nta'a mayi ilotague' ca 'alhua cam hueta'a, ishite da maichi huapegue' da detaxaŷapegue' ca nta'a, huo'otaq da ŷauota'a ca ltaxaŷanexanec mayi maichi lca'egueshic.

'Enauac na shiŷaxauapi saishite da qaillapeguem da huo'o ca inoxoneu'a cha'ayi nachi 'eeta'am 'enauac na laŷipi shiŷaxauapi da ishite da huo'o ca lo'onataxanaxac que'eca 'alhua mayi hueta'a.

Da lasataxac 'enauac na shiŷaxauapi nachida da I'ot da l'aaxac ca nta'a mayi ilo'ogue 'enauac namayipi, de'eda nasataxac damayi da qai'ot qalaq ŷataqta qaŷaŷamaxatchiguii da nallida't qanqoŷin, qataq da qaŷahuo'oi naua laloqo'te qanqoŷin de'eda allitaxac, de'eda allitaxac I'ot da qaŷatalec cam dauegaxan ŷaguec na nale, qataq saishite da qaŷauaachigui qanqoŷin cam nallij i 'oonolec, huo'otaq da qaŷahuota'a cam lŷa lataxac da huo'o ca qanallijlec da qaŷahuotaique da nta'a, mayi nataq'en ŷaŷamalechiguii.

ARTÍCULO 22

'Enauac na shiŷaxauapi mayi ŷalectaigui cam laŷipi ca hueta'a, namayipi ishite da qaŷauo'o aca lashieu, qataq na llalaqpi, qataq ishite da qaŷanem da ivita da iŷaxanaique. Chigoqchigui qanqoŷin aim laponguishi anom mayi ilotague' ca nta'a mayi ilotague' que'eca 'alhua, huo'otaq ana chigaqa'a na laŷipi nta'alpi naua lŷa't 'ale'u, mayi qaŷamaxatchiguii da llic da

ilo'ogue ne'ena nta'alpi, 'enauac ne'ena shiŷaxauapi iuen da ŷataqta machiguini qanqoŷin qataq ishit da nhuanau'a de'eda nsallaxa qataq da ŷalecta'aguet 'enauac na laŷipi, qataq da maichi lataxac na mayipi, qataq 'enauac na lhueneguesat da nachaalataxac qataq qaica ca 'eetega da I'ot da maichi laaxataxac da maichi nachaalataxac.

ARTÍCULO 23

'Enauac na shiŷaxauapi ishit da ŷauo'o ca l'onatac qataq da maichi lca'aigue ca ishit da I'ot l'onatac, qalaxayi nalochiguui qanqoŷin da lashiichiŷaxac qataq ŷataqta ŷaŷamaxadeeta qataq qaiqataxana'I da saishit da huo'o ca na'aq nachi qaica ca l'onatac camayi.

'Enauac na shiŷaxauapi saishit da huo'otaq qalca'atagui da qai'ot ca nshiitenaguec ca l'onataxanaxac, da lashiichiŷaxac nachi 'eeta 'am na leŷipi.

'Enauac na shiŷaxauapi mayi do'onataxaatac iuen daŷataqta nalochiguui qancoŷin da nshiitenaguec qataq ŷaŷamaqchiguui qanqoŷin qataq qaipactelec nachi 'en'am na llalaqpi, de'eda nshiitenaguec nateeteguet qanqoŷin da no'on lataxac camayi qataq ŷataqta qanaloqteeta't da ivita ca laloqo', huo'otaq da iuen da qaŷamaxaji cam saxanaxa da ime, huo'otaq ca lŷa lataxac mayi ishit da mpaxatalec da lataxac camayi.

'Enauac na shiŷaxauapi ishit da I'ayii da llic da no'onataxanaxac huo'otaq da nanedeu'a ca lŷa ilotague' da no'onataxanaxac da yaqto' ishit da qaiuejlec da l'onataxanaxac.

ARTÍCULO 24

'Enauac na shiŷaxauasat sa ishit da qaillapeguem da nmataxac, qataq ishit da huo'o ca lŷa I'ottac da ŷI'imaqta, qataq naua loga'te da l'onataxanaxac naloteguet qanqoŷin cam I'ottac, qataq naua laloxoqui' da nmateec qanqoŷin qaishiite'n.

ARTÍCULO 25

'Enauac na shiŷaxauasat iuen da ŷataqta nalochiguui qaica da huo'o ca iueetac qanqoŷin, nachi 'en'am na llalaqpi, no'oita qataq ŷaŷamaqchiguui, sa ishit da iueetac ca aloq qataq qaitaunec ca lŷa ntaunaxanaxac, nataq'en iuen da qaiqataxana'I aca nshiitenaqte da ivita da qaica ca l'onatac, huo'otaq da sano'on, huo'otaq da sada' aigue, huo'otaq da pa'aic, qataq da mashi ŷa'axaiqui, huo'otaq da huaigui ca lŷa lataxac, huo'otaq da deqat ca chigoqtapoigui na lhueneguesat ŷasouaxat cam negue't ca lataxac mayi sa ishit da lhuennataxa ca mayi.

Da 'eetec aca 'alo da deco'o qataq na nogotolec iuen da ŷataqta qantela'a qataq qanayiuapegue'. 'Enauac na nogotolec mahyi chigoxoiguilo caua namoxo'u huo'otaq da ŷaqa'a aca chigoxoigui namayipi 'enauac 'eeta 'a't iuen da ŷataqta qantela'a.

ARTÍCULO 26

'Enauac na shiŷaxauasat iuen da ŷataqta napaxaguen, qalaxyi de'eda napaxaguenataguec sa ishit da ishiiten imauec de'eda hua'auchiguui napaxaguenataguec da yaqto' ŷaŷate'n naua llico na hua'auchiguui

naŷaaneguesat. Ne'ena hua'auchiguii naŷaaneguesat iuen da ŷoqta qalapaxai da qai'ot. Da qalapaxai ca llic ne'ena ŷotta'a't naŷaaneguesat qalaq iuen da qaica ca ichiŷauga, qataq da qananedeu'a ne'ena qaŷoqotchiguemec naŷaaaneguesat qalaq qaica da huo'o ca qaiŷotauga, qalaxayi nataq'en iuen da qailoteguet cam ŷoqta 'eesa sa ivi' da nqat ne'ena naŷaaneguesat.

Qataq 'enauac ne'ena napaxaguenataxanaxacpi iuen da ŷoqta naaxat naq'en da lauatonaxanaxac na shiŷaxausat qataq ŷa'anaqchitec cam lataxac mayi ishit da I'ot qataq da huesochiguii naq'en namayipi, nataq'en itaunec da ŷaŷateeteguet na lataxacpi, qataq da 'eetec da qanhualaxaine' ca nŷa qataq da 'eetec da nhuoteeta't na netaquete naua ŷotta't 'ale'u, qataq 'enauacna ŷotta 'a't na l'aqtac huo'otaq ca l'amqajnataxanaxac, qataq da qalapaxai ca llic na I'otpi na ŷotta'at nta 'alpi mayi naneeta'a't da yaqto' lactapiguii na shiŷaxauasat.

Nam huo'o na llalaqpi ishit da maichi lca'ateu'a ca lataxac da napaxaguenatageuc na llalaqpi.

ARTÍCULO 27

'Enauac na shiŷaxauasat ishit da maichi chigoqchigui da ŷalegueu'a 'enauac na maichi lalamaxat lataxac cam netaigui shiŷaxauapi, qataq 'enauac na ŷaŷamaqchiguii lataxagesat na lalamaxat layaanecpi mayi ishit da ŷaŷamajni camayipi qataq ishit da ŷaconguet ca chigaqaigui.

'Enauac na shiŷaxauasat iuen da qantela'a cam lalamaxat laŷaanec, huo'otaq ca yi'oqchigui lalamaxat mayi chigaqaigui ca I'ottac laŷaanec, huo'otaq da I'ottac ana nere, huo'otaq na no'on ne'enaqtacpi mayi maichi lalamaxat l'onatac.

ARTÍCULO 28

'Enauac na shiŷaxauasat ishit da qai'otec ca llic da yaqto' qaica ca machicague't da ivida'alo naua lŷa't 'ale'u, mayi qailotagueta mayi nataq'en ividaugalo 'enauac ne'ena nqataxacpi mayi mashi qanasachigui, yaqto' ŷataqta qaipacchigui da qai'ot 'enauac ca 'enapec.

ARTÍCULO 29

'Enauac na shiŷaxauasat ishit da huo'o ca I'ottac cam hueta'a, cha'ayi nachicata cam hueta'a mayi huesochiguii da huo'o cam I'ottac qataq sa ishit da qoŷiitega.

Da ivita da huo'o ca ŷacoolec da I'ot huo'otaq cam lŷa lataxac mayi sa ishit da illapec da qai'ot ne'ena nqataxacpi, qalaq 'enauac na shiŷaxauapi ishit da qai'ot ca ŷashiita ne'ena nqataxacpi yaqto' ca mayi nataq'en ishit da huo'o ca qai'ot, qataq da qaipacchigui da qai'ot ca lataxac ŷaŷamaqchiguii, yaqto' 'enauac na shiŷaxauasat qaica ca machicage't qataq sa ishit da huo'o ca qoŷiitega.

N'ena nqataxacpi qataq da nataxac mayi huesochiguii, sa ishit da qai'onataxana da huo'otaq qaŷataŷa'aguet cam 'eetapeguec qataq nam l'auaxanec lataxac mayi lapaxai na ŷotta'a't nta'alpi mayi nanetta 'a't.

ARTÍCULO 30

Qaica qome da huo'o ca 'oonlec ne'ena nanettai mayi qanasachigui da qoŷinac chigoqchigui da I'ot ca l'aqtac ca camachicague't na nta 'alpi, da huo'otaq huo'o ca ŷanem shiŷaxauapi huo'otaq ca 'oonolec namayipi da yaqto' huo' ca ishit da ŷacoolecda I'ot, huo'otaq da ŷaueca'a't ca laŷipi da yaqto' nlaxaji ca 'oonolec ne'ena nqataxacpi, huo'otaq da nlaxaji da nataxac mayi huesochiguii, mayi mashi nasachigui qataq lapaxai.